

蕉廊脞錄



蕉廊脞錄卷三

錢塘吳慶坻撰

吳興劉承幹校

吾鄉丁飛濤先生澎又號藥園與仲弟景鴻季弟滌皆以詩名世號三丁先生成進士官禮部郎中時方冊立西宮念無嫺典禮者調入東省兼主客主客卽古典屬國也貢使至必譯問主客爲誰廉知先生能詩以豹皮美玉賂吏人吏人竊藥園詩贖之歸國長安搢紳以爲榮以事牽累謫居塞外崎嶇二千里郵亭驛壁讀遷客詩大喜後車妾亦喜曰得非聞中朝賜環詔耶曰

上聖明賜我遊湯沐邑出關遷客皆才子此行不患無
友渡遼海望長白諸山土人以魚爲飯糧盡輒苦飢河
冰合常不得汲樵蘇不至五日爨無煙取蘆粟小米和
雪齧之日晡山鬼遙嗥夜聞扣門聲童子從隙窺之虎
方以尾擊戶先生危坐自若歲盡無錢磨墨市上書春
聯兒童婦女爭以錢易書去居東岡躬自飯牛與牧豎
同臥起暇輒爲詩温厚無遷謫態國子藩公聞其名禮
爲上客凡五載始得歸見林璐所撰外傳先生詩名人
人知之此其謫居軼事也

周西坪修撰未第時大司寇勵公廷儀延之入幕以石

門逆書案屬爲勘核修撰得迹涉株連者二十四人力
請除名勵公意不謂然修撰曰 聖主好生豈嗜多殺
烈風雷雨必不終朝因擬爲奏對而二十四人者竟得
免後督學陝西有妄思寅緣私諷家奴通款者修撰旣
懲其奴而憫考生之愚思曲宥而明儆之覆試諸生日
設資盃公案上注水滿之召其人捧而擲諸堂下其人
愕然乃語之曰爾惜之乎爾身之弗惜而惜此區區者
乎卒使擲之復語之曰一經敗壞能復全乎吾與爾猶
是也忘身徇賄其可乎其人免冠謝涕泣悔罪遂宥之
王禮堂樹隱居北郭有米南宮癖收藏奇石甚富因自

號曰石交選其尤者七十有二梁山舟侍講書七十二
峯閣額以貽之後又得倪文貞公石交圖喜其與己字
台懸之閣中復摹鐫之今石歸余家度之峭蒨廊以廊
外有巨石上鐫峭蒨二字不知何人題也

龔蘅圃侍御翔麟罷歸清貧居張駝園自號田居王石
谷爲作田居圖其先居橫河沈氏庾園園有玉玲瓏石
宋宣和花石綱之遺也道光間園歸沈蓮叔拱宸同治
間歸周琳粟家勳石故無恙余嘗徘徊其下旁有白皮
松亦百年物也

南潯莊氏私史之獄錢塘陸麗京仁和范文白海寧查

伊璜皆牽連被逮麗京弟梯霞脫身北走投其從舅氏
裘信甫謀申救信甫長安大俠也歎曰酷哉此禍顧前
者投牒訴誣沈閣不上奈何麗京至都復解浙候鞫而
捕梯霞嚴梯霞間道歸自詣獄父子兄弟僕從婦女百
餘口相向哭而裘信甫已陰以實情別白黑輸要路內
外無一人知者比錄囚呼名共二十一家長刀邀遮顛
踏入市陸范查三家竟獲免及信甫死梯霞爲制服三
年泣語子弟曰微舅氏爾曹皆黃沙白骨也世盛稱吳
六奇脫伊璜於難而裘信甫事罕有知者

吾杭藏書家若趙氏小山堂吳氏繡谷亭孫氏壽松堂

汪氏振綺堂海內無不知者至如乾嘉之間舊家遺俗
率好儲書而名不顯著者尙多如東城郁氏禮字佩宣
號潛亭錢塘諸生家素封藏書充牣潛亭又增益所未
備時小山堂書已星散所餘殘帙尙多異本潛亭悉力
購之所居駱駝橋去厲徵君樊榭山房一里而近傳鈔
祕冊尤夥徵君歿後其家出所著遼史拾遺手稿要素
厚價久之不售潛亭以四十金購得之中間尙闕五十
葉百計求之不得鮑廷博以文偶步至青雲街見拾字
僧肩廢紙兩巨簾檢視之皆厲氏所棄徵君手錄遼史
拾遺稿本在焉亟市歸授佩宣棼如亂絲一一爲之整

理閉戶兩月綴輯成編適符所闕之數藏書之室曰東
嘯軒軒額爲董香光書庭中古桂二株相傳明萬厯間
所植交柯接葉清陰覆檐室中牙籤萬軸都成碧色潛
亭晨夕校錄於其間百年以來滄桑幾易東城郁氏子
姓寂寥里中故老無復有知潛亭其人者吳中葉鞠裳
侍講藏書記事詩載佩宣事頗詳

雍乾間錢塘梁氏勳閥旣顯門才極盛而以文莊公孫
履繩玉繩弟兄爲尤著履繩字處素號夬庵於諸經中
尤精左氏傳嘗鑄小印文曰臣有左傳癖撰左通若干
卷析爲六類曰廣傳曰攷異曰補釋曰駁證曰古音曰

臆說錢竹汀詹事見之歎服中年徂謝未及成書補釋
一門三十二卷采摭繁富其子祖恩刊行之玉繩字曜
北號諫庵著史記志疑三十六卷元號略四卷古今人
表攷九卷誌銘廣例二卷呂子校補二卷警記七卷蛻
稿四卷總題爲清白士集蓋諫庵分居塔兒巷山舟先
生書清白堂額畀之因以自號每一書成輒就錢竹汀
盧召弓孫頤谷諸先生商榷故踳駁絕少諫庵寄弟處
素書云後漢襄陽樊氏顯重當時其子孫雖無名德盛
位世世作書生門戶吾仰之慕之願與弟共勉之其風
尙可想矣

顧涑園太守光乾隆戊午舉人以大挑知縣宰清豐有

惠政累擢廣州知府粵督某嫉之遽引疾歸後五十餘年其邑人有禮天竺大士至杭州者知公里居無恙相率三十餘人登堂羅拜而去昔時人情之厚如此仁和

湯典三

禮祥

爲詩紀其事詩云山雞愛毛羽志士重修

名況乃爲民牧毀譽尤易成清豐有賢宰吾鄉推耆英
憶昔漳衛水一決連魏城哀哉城下骨尙帶蛟龍腥
賑恤招流亡溝壑餘零丁三上河渠書議格終不行
紀災淚盈紙鴻鴈同哀鳴距今五十載父老來西陵
自言清豐民我曹皆侯生侯今喜健在侯昔何賢能
中有少年

子傳聞自父兄今幸睹侯面恨未竹馬迎或長跼不起
或稽首階庭或起焚爐香或笑或涕零何以獻我侯紫
棗雜黃橙何以頌我侯壽考而康寧我公前致問小惠
何足稱無端念衰朽而我媿益增願爾爲良民願不負
太平手摩父老頂歡愛如孩嬰出門尙回顧觀者填柴
荆允矣古遺愛亦足驗民情民情有如此願共惜賢聲
太守所居在東城河側敝屋數楹顏曰河干屢自稱河
干先生

于忠肅不諫易儲事後人爭疑之相傳齊次風侍郎嘗
宿祠中夢忠肅告曰當日諫易儲疏留中不發外人無

知者子異日入史館當爲我表章之旣而侍郎果直
禁廷與修明史遍檢前明檔案無之餘姚邵二雲先生
習聞其語入館後留意蒐訪最後于通政使署得當時
舊冊有大司馬于某爲太子事一摺具載月日數百年
疑案至是始定惜疏稿卒不可得見按此事又見阮文
達擘經室集及 先大父養吉齋餘錄

厲徵君東城雜記原名城東雜錄見抱經堂文集跋云
吾祖居在東里坊其北則艮山門其東南則慶春門于
東園最相近桑叟甫先生之居在焉先君子從幼往來
里人有雙先生之稱後之人有續錄者亦可以爲東里

重矣吾祖居卽所謂數間草堂者也

武林卓珂月人月崇禎初作千字大人頌錯綜成章甚有思理開章云大人御天君子名世立千秋基興諸夏利高文起家建景閏帝二百餘年我皇陟位河澄寶出鳳舉毛從虞雲兩旦漢日再中羣黎作乂列州攸同可謂高文典冊篇中嶽伯分佐歲星可招貢珠盈寸舍矢五扶投淵潔耳何傷盛朝帳染墨蹟帷集書囊武功稱甲吉運始丁誠推韓轂令賞終纓語皆警策枇字云鬱尊黃金膳枇素木枇音匕義取祭用素枇也杷字云姑婦任績夫男秉杷杷田器也按卓氏爲塘棲望族明季

國初門才極盛珂月詩有刊本他文罕見漁洋池北
偶談載此一節亟錄之吾鄉羅鏡泉以智嘗集自來重
次干文者凡數十家珂月作亦列其中張仲甫先生嘗
爲之跋兵火以後不可復覩

家小穀太守清臯西穀府丞清鵬爲穀人祭酒孿生子
幼時聲貌無異家人幾不能辨以羈角左右別之祭酒
封翁晚年目雙瞽兩孫至前則摸羈角呼之曰爾臯臯
耶爾鵬鵬耶年十七同入縣學後隨祭酒於揚州安定
書院命小穀與兄小酉作鱗魚詩小酉句云安得萬錢
供箸下卻逢四月住江南小穀詩云人情爭染脂韋易

世味能消骨鯁難祭酒笑曰大兒不脫寒儉氣要亦名
士風流八兒乃欲爲強項吏耶一時傳爲美談

張仲甫舍人應昌嘉慶庚午舉人以恭繕實錄議敘中
書舍人中歲苦羸疾不復應禮部試惟以箸述自娛所
箸有春秋屬辭辨例編八十卷補正南北史識小錄國
朝詩鐸彙壽軒詩鈔煙波漁唱同治九年詹事府詹事
夏同善通政司副使朱智鴻臚寺卿許庚身 奏進春
秋屬辭辨例編特蒙耆年好學甚屬可嘉之諭老年子
姓彫落招嗣子嗣孫賃屋菜市橋東榜其門曰家傳孝
友里近忠清蓋所居近忠清里距吾家僅百武耳晚通

禪悅腰腳轉健年七十餘猶步登翰光爲詩紀之

舍人清貧而性孤介杭州東城講舍薛慰農太守創設制義外兼課經解詩賦太守去官卽主講席繼之者爲海鹽張銘齋先生先生歿里人有言于郡守欲延舍人主講者舍人辭不就自言年衰耄經義詞章皆荒落豈足勝講授之任顧家無儋石儲其嗣子雲齋浼余勸阿翁勉就此席余知不可而雲齋固以請一日從容謁舍人語此事舍人厲聲曰兒輩不曉事卽長官延聘我必堅辭必強我當以死拒之余斂容歎服時又有薦會稽李萼客來主講者李亦辭不就後見越縵堂日記言杭

州張舍人謀此席甚力不欲與爭此則傳聞失實舍人介節余固親見其事親聞其語者不可不爲辨之也

龔闇齋觀察以部曹直樞廷屏絕華侈退直輒閉戶讀書時人有熱官冷做之誚外簡徽州知府調安慶時奉特旨搜捕教匪餘黨皆有真姓名安徽州縣有緝獲解省者皆令首府親鞫之公察知纍纍桎梏者皆非真教黨也謂諸囚曰子當爲若輩申救之乃寓書大司寇戴簡恪公陳所獲逆黨冤誣狀戴公答書曰此十數人者皆上書名指拏之人未可輕縱於是諸囚皆棄市制府百文敏公以獲匪案上章臚薦列公名居首公

馳謁文敏辭官文敏曰爾之來吾知其爲辭保也然安
徽一省官半登薦剡豈可獨遺首府若以此去官尤不
可公曰不去官猶可若一條血翎子則斷斷不敢受也
文敏曰諾遂刪公名而心益器公明年具疏密保尋擢
授蘇松太道同官中以此案升擢賞翎枝者三年內皆
病死公旋乞歸六十一歲時患脾泄幾瀕于危恍惚見
前囚十餘人至呼冤不置公曰爾等之死由某某輩邀
功也何仇我爲曰某某等均就冥誅矣公許救我而不
救豈得無憾公曰余上刑部尙書牘稿故在余無力救
爾等固吾之憾也命家人檢原稿焚之囚遽散去疾遂

瘳壽七十五歲而終公子寶琦述其事且言公七十生朝兒孫奉觴爲壽公猶舉前事爲戒云

魏春松御史成憲官臺諫以清介聞嘗 召見垂問家

世 上曰汝讀書人家也御史因倩人繪圖顏曰讀書人家以誌 恩遇晚年主講紫陽書院課文字外時時以讀書立品爲諸生勛先大父贈詩有曰平生但識忠孝字爲報門生休問奇

仁和曹柳橋丈籀初名金籀字葛民少工詞章三十後一意治經嘗言治經宜先通小學生平顓精許書於羣經尤致力春秋篤好穀梁家言年五十成春秋鑽燧一

書多用穀梁義著說文訂譌稿焜于兵所存惟古文原
始一卷晚年哀前所已刻書及亂後所作文字彙爲一
編名曰籀書道咸間居城東地饒水竹近南宋紅亭醋
庫遺址與里中諸老結紅亭詩社久之移居皋園之西
偏顏其室曰市隱草堂同治初徙居鹽橋之東賀衙巷
於宅東隙地闢小園榜曰臥霞先大父戊辰歸里丈與
張仲甫高古民兩先生時相過從余撰杖侍談嘗呼余
爲小友年七十矣高睨大譚意氣如少年惟喜嫚罵人
多疾之歲丁丑與族姪舉人曹鴻藻構訟不勝著三世
聞見錄臚列巡撫布按道府仁和知縣場大使諸人姓

名分爲陽類陰類加以評騭蓋以陽爲君子陰爲小人也書詞拉雜頗類風狂於是布政衛公榮光言于撫軍梅公啟照請窮治撫軍以屬按使升泰升泰飭仁錢二縣逮之時丈已病疽發于背金丈曰修出爲緩頰翌日而丈遽歿乃逮刻字匠焜其版撫軍奏聞褫候選訓導職以原書咨軍機處備案余時在里中竊歎諸當事以褊衷而摧抑一文儒殊無謂又歎丈以經生耄年晚而不能以道自守卒用文字賈旤爲里黨所訾可深惜也譚復堂日記嘗痛詆之稱爲曹老人謂其實不知學此又文人相輕之習丈嘗入京師年五十時吳縣潘文勤

師壽以聯曰代推小學有達人天假大儒以長日語極推重蓋說經治小學文勤固深佩之也

富陽董文恪文恭父子爲一代名臣文恭旣正揆席嘗圖形紫光閣川陝平 賜騎都尉世職年七十九薨於

位 睿廟臨奠御製輓詩中一聯云但有詩書貽子姪絕無貨幣置莊田並 命刻詩墓次以示後人數傳而

後子姓乏絕文恭孫婦邱安人煢煢居京邸同治己巳南歸謁祠墓稽譜牒以族孫瑾承殤子繼曾後瑾有末疾不能備宿衛其子長齡是爲文恭五世孫當襲世職先大父與許信臣中丞高辛才濮少霞兩觀察請於

巡撫楊公疏聞於朝先臣之門絕而復續而邱安人力
繇宗祐動合禮意亦可謂賢矣

族伯父筠軒先生自江西告歸與里中諸老結鐵華吟
社起戊寅訖乙酉湖山踴宕余亦常侍末坐社集以湖
上爲多因於永賴祠側遺安室榜曰鐵華吟社先生自
爲跋云昔童參政創西湖八社凡南北山勝處悉麗壇
坵吾社乃僻在一隅隘矣然柔艣輕輿惟意所適舉湖
山之寥廓幽邃以供吾儕之嘯詠有日貢其奇而不竭
者是八社廣而吾社未嘗隘也同社諸君抗懷往事有
內史今昔之感謂宜署榜以詔來茲於是乎書光緒十

年上巳

仁和王文勤公入樞府由吳江汲引頗爲清流所抨擊
尋乞養親歸以滇案降官服除卽家拜湘撫擢滇督再
蒙特召又出督直隸未幾復召入軍機庚子之亂 兩
宮西狩 文勤懷軍機處印單車追及至懷來扈從入
秦自是 東朝眷倚益隆 恩禮優渥年七十八告歸

命馳傳歸戊申家居聞 兩宮升遐隨班哭臨遂疾

篤薨於里第生平相業無可稱述然當己庚之間 東
朝意主廢立嘗示意文勤文勤力陳不可庚子拳匪之
訖亦頗諫諍幾爲端王諸人所誣陷微榮文忠力保全

之亦與袁許諸公同棄柴市矣余嘗得文勤日記數十
巨冊皆其官京師及鄂湘時所紀論人論事皆有識在
鄂臬湘藩湘撫任公餘無日不觀書者老輩固不可及
又辛未三月某日日記一則云郭子美軍門來晤近以
省親不先請 旨飭部議處語次頗自倣畏因以 君
父之恩臣子之分迎機而善道之並爲言到此地位惟
以忠君敬上虛己下人乃爲人所不可及若以勛業日
多兀冑自喜便使人一覽無餘矣渠聽之悚然感佩之
情溢於言表因知其天資過人本屬一時奇傑再能歛
才就範尤爲不世之才國家禦侮需人所貴有以善全

之也讀此數語可想見其愛才之篤待友之誠

余從祖姑母歸山陰徐公業鈞字鴻冶以名孝廉出宰山左所至多善政平生篤學嗜古尤長於詩從祖姑母字月蕙善度曲兼工詩詞閨中酬唱爲樂公試京兆從祖姑自蜀寄五古一章公旣和之並以長箋合寫寄歸公屢困場屋嘗有下第過臨叩題壁二絕句曰

云云一

自諷一自解胸次卓然吐棄塵俗宜其卒爲良吏也

葉貞甫丈荅友人辭絕勝營諮軍書云新雨乍晴忻奉手教得與諸君子賜書並讀一過竊以爲愛之太深知之轉淺期之太厚待之轉薄古來士大夫行止去就視

所向之枉直邪正以爲斷柳下惠不易介介之推不言
祿各行其志良非得已孟氏曰說大人則藐之勿視其
巍巍然此言可說之大人也若不可說則直藐之并不
必有巍巍之見存易曰不事王侯高尙其事此言不可
事之王侯也若可事則無損吾志又何必有高尙之見
存觀人觀己惟慎所從見理欲圓立品欲方成心不可
有定識不可無持躬處世俛仰乃適今使孤雲出岫託
足便非小草向榮屈節以就斤斤于趙孟之貴賤卽頂
上轉丹腰閒佩紫不過朝華夕落身世浮漚已耳是何
足爲榮辱哉至所言不能忘情得無告者過乎夫以觀

面不識之人有雲泥相隔之分何情之有何不能忘之
有此中推挽固自有人然而聖門亦仕季氏何以費宰
獨辭不强以同聲之應宰我欲窮仁者畢竟從井不可
難罔以非道之端區區一官位誠卑矣而不可卑者氣
節職誠小矣而不可小者器識彼可以勢燄熏灼威力
制馭者無他人惟心目中時時有烏紗在患得患失傍
徨於寤寐畏首畏尾固結其功名斯可以受風雲之叱
咤而以是爲雷雨之經綸僕則不能也生長儒家稍知
廉恥硜硜之見決不可移以故郵檄七至封泥在完槽
不知其所言何事邀伽婦縱窮魔技而來信天翁自有

知命之學彼而効我我不怨之彼不効我我亦不德之
前則句留淇右襴衡之刺遲通今將長嘯蘇門淵明之
腰不折青氈一片待賈而沽未始不可娛菽水況貧乃
士之常年來抗塵容走俗狀欲捧毛生之檄依然范叔
之寒則卽屠刀放下寶山空回尙可立錐何愁餓葶行
素居易此衷夷然蒙書來殷殷俯教此皆愛我期我而
勸我者敢不徑遂披瀝暢其所欲言若汎汎者交則惟
謝之曰某不敏負明公教自知暴棄行當待罪泉麓而
已蛙蚓微吭鳴不驚人鷗鷺閒心伸于知己統惟鑒察
不具百一丈有才名時勝克齋保方督師河北欲羅致

幕下勝驕蹇慢士文逆知其必敗故堅不就召也

陳扶雅先生善嘉慶辛酉舉人治經學爲古文辭十應
禮部試卒以大挑官教諭晚入汪氏東軒吟社與先大
父相酬唱其歿也莊芝階舍人爲之傳先生孫學繩字
硯傳工駢文爲人掌書記咸豐辛酉客浙布政使幕遭
寇亂轉徙江北嘗箸兩浙庚辛紀略言賊陷浙事與平
浙紀略及談浙諸書小有異同然當時在幕中見聞固
較真也後有自述駢文一首注云先曾大父諱祖蕃字
古歡著傳信閣詩稿先大父諱善字扶雅著研經日記
四書古義晉書校勘記兩晉疆域考福建通志列傳稿

損齋文集先大母汪諱玠字孟文箸古韻軒詩稿竹閒
書訣先君子諱錫字子諒著省園詩文集又藏書五千
餘卷金石碑拓書畫數百種武進張舉文編修虞氏易
等稿本十三種城破皆燬于火先生嘗從舉文游以所
箸周易虞氏義九卷虞氏消息二卷畀先生舉文卒言
於太傅儀徵相國爲刊行之而先生及其先人箸述今
悉不傳良可痛惜

嘉善查禮齋先生奕照又號丙塘自號龍山老樵初白
老人曾孫少壯奔走四方爲人司章奏阿敬敏公百文
敏公尤敬禮之以薦得淮安府同知棄官歸里以詩酒

自娛年八十九卒箸東望閣詩鈔二十卷媵琴館詞鈔一卷別有敬業堂詩集註惜未刊行詞鈔中有慶春宮一闕題云余年二十六客京師始從高慕陶習琴嘉慶初遇武林李玉峯手授十二曲玉峯爲海內第二手曲盡指法之妙蓋於今四十年矣吾鄉人今殆無知有李玉峯其人者

先大父官黔久嘗箸黔語二卷可繼田山薑張介侯兩黔語之後慶坻刊於京師在蜀以贈陳衡山大令刻入叢書光緒癸卯使滇往來經黔郡縣周覽巖洞諮訪人物證之舊聞往往而合顧兵火之後文獻無徵往時鄭

莫兩家流風餘韻無復存者可爲噴息楊大見心以其
尊人雪漁編修手書黔陽雜詠五十首卷子示余讀之
如理故籍如賡昔游詩中所紀黔中掌故有出於田張
二書之外者足爲後來志乘取資憶余滇行兩經安順
府假館試院見雪漁所書啟秀堂楹帖嘗有詩云山
城日莫暫投裝墨妙重瞻啟秀堂羨煞故人歸隱早十
年清譽滿蠻鄉今讀此卷而雪漁墓有宿草矣

楊雪漁編修家遭粵匪之亂盡室自燔子身跳免轉徙
至漢口始得以教授自給嘗館大冶縣易培初大令所
值縣試屆期忽一魏姓介易之司會計者求見雪漁謝

之越日又至延入書室則縣署所與交易之錢肆主人也既而促坐密語曰縣試在卽某有子某某前官縣試曾列案首不得入泮今又將試矣君爲官閱試卷幸提挈之縣官清正不敢干故敢以私請雪漁拍案起曰汝視楊某何如人官清正我乃不清正耶某惶愧走出君遽告大令大令立傳其人痛斥之監禁至試畢始釋雪漁生有自來其告終之前數日寢疾作譫語言有僧徒多人來相迓頻作拱手狀又言前身爲某寺僧名寶光號普慧又時時沈吟數語曰曲罷當筵人生一世鶴來華表瞬息千年若自挽若偈語殆所謂去來了了者

歟

庚子袁太常之喪歸杭州雪漁撰聯語挽之曰時局艱
哉讀三疏洋洋禍福不可知盡犬馬愚誠而已男兒死
耳歎孤忠耿耿是非終有定問春秋直筆何如此事弔
挽措辭最難此聯可謂得體

歸安沈義民先生偉田道光丙午舉人咸豐庚申官吳
縣知縣有惠政粵匪陷蘇州先生守死不去賊至痛斫
之身受十七創暈絕一老人救之而甦掖之出自投於
河者再蘇人多德先生者又救之護持至滬與母夫人
重相見先生精于醫懸壺市中以供甘旨自號曰醫隱

又曰再生子其見母詩云有母六十九視我傷遍身痛
不在我體乃在我母心其書憤詩曰此仇不能報此罪
何從贖搔首問蒼天浩劫何太酷其後李文忠公知先
生有循聲且以抗賊受刃傷當時以知縣不知下落入
告文忠乃專疏據實以聞請復原官補江陰知縣光緒
初母夫人壽九十四先生六十一矣母九十七而卒先
生服除不復出壽亦逾八十先生鄉舉後恆寓杭州花
園巷與先君子訂交余垂髫時常見之光緒丙子謁先
生於江陰見額際項間創痕猶在云

艮山門外百步塘有水月庵水月老人故居也老人孫

姓名文字文石號水月會稽諸生隱于杭榜所居爲梅園性恬靜一介不取間爲長短歌詞問其年嘗稱九十髮盡禿人多以僧呼之瀋陽范忠貞公撫浙嘗訪之老人昔從忠貞大父游時忠貞尙幼老人撫其頂曰是兒當建節吾土吾猶見之至是忠貞太夫人以告忠貞遂物色焉屏騶從往數與縱談捐俸爲建百步塘勒石紀之時西溪多虎患老人語忠貞曰山頭大蟲任打門內大蟲休惹忠貞遷閩督老人又言曰耳後火發時須要有主意其後忠貞竟死耿難老人素不喜與世事及是人以爲前知爭就之老人益厭惡避去不知所終土人

改其居爲水月庵肖老人若僧象召其徒奉之爲香火院王文貞池北偶談稱之爲水月和尙蓋當時固誤傳爲僧也家穀人祭酒嘗與黃相圃姚春漪至其地皆有詩逮今百年無復有知者也

樊榭徵君墓在西谿法華山下王家隴嘉慶十四年里中諸老葺之爲置墓田付交蘆庵僧常源爲納糧供祭之用歲以春秋酌酒澆墓家祭酒穀人先生撰記山舟學士書之蔣蔣村請阮文達公書墓碑文達有詩記事徵君無嗣其栗主不知何時供奉於湖墅黃文節祠道光九年趙雲門鉞蔡木龕焜李西齋堂與同里諸老以

徵君墓在西谿主宜近祔乃移奉交蘆庵以姬人朱氏
月上祔祀其側月上主蓋徵君手書也時胡書麓學士
有文記之今諸文詩碑石尙存而栗主經亂焜失同治
間道州何子貞丈來游交蘆庵乃補書徵君及月上二
木主里人奉祀于寺之東偏松生丁丈乃以奚鐵生畫
西溪圖卷子及高邁菴錢松壺戴文節諸畫卷付與僧
藏之光緒間里人增設徵君夫人蔣木主同祀龕中又
增一龕祀杭堇浦先生及其夫人二妾杭厲同時又皆
無後溪山勝地神靈往來重賴後賢香火不墜亦禮所
宜也惟杭先生墓相傳在大馬山汪子用丈求之累年

竟不可得

桑孝子祠在杭城觀橋街有石坊一祠祀錢塘孝子桑天顯天顯字文侯居大樹巷鬻養笛爲業性至孝父病膈天顯合羊脂和粥以進及父卒乃抱鐺日夜泣人爲繪桑孝子抱鐺圖歿後里人私謚曰孝勇弼甫先生孝子子也雍正間召試通知性理賜進士官工部屯田司主事薦試博學鴻詞弼甫子繩球字夔石諸生有青桐書屋學語弼甫之經營建祠立坊也集資未成繩球節齋修脯積鏹盈千將以成父志未幾病亡遭胠篋其後里人乃爲成之咸豐間寇亂祠燬坊存同治間里人釀

貴重修歲時奉祀用資觀感余居里中每經行坊下輒肅然起敬世風日敝倫紀蕩然亟書之以詔來者

弢甫先生幼嘗受業於勞餘山及壯益究心宋儒之書性孤潔方官水曹歸寓輒反扃其戶以杜雜賓乞養歸闢餘山書屋於東皋別業著有論語躬行實踐錄歷主大梁道山濂溪歷下講席執業者咸稱桑門弟子好山水遊日能步行百里徧陟五嶽自署獨往生又號五岳詩人所至吟詠成帙洞庭嵩山華山泰山衡山恒山閩嶠諸集皆紀游之作也

西谿花鳴在開化涼亭之左地極幽邃修篁古木不漏

日色中多梵氏居其可資游憇者曰六齋曰在澗庵曰
眠雲室曰九松精舍曰休庵曰梅溪庵曰溪飲庵曰怡
雲庵曰肯庵曰飲峯庵曰樹雪林曰白雲堆凡十二處
報恩寺唐元貞間建在萬松嶺下咸淳臨安志報恩院
紹定間御前承應者也元至正間築城移建大井巷併
入海會寺成化間仍徙故址有舞鳳軒萬菊軒銅井諸
勝宏治十年叅政周木改寺爲萬松書院僧寂源于萬
歷王子改建南山楊梅嶺下名報恩庵見西湖志及武
林梵志今則間報恩寺已無知之者惟鳳山門外有庵
一屋宇湫隘繚以土垣其中地頗平曠多植桃樹花時

絳雪彌望嘗與丹徒戴壺翁攜茗具往游焉

黃文節公祠在杭城迤北湖墅舊名青莎里有村社曰蘇家廟相傳其神爲山谷何徵君春渚書黃文節公祠額榜于門建清風閣于祠後按公宦跡未嘗至浙而吾鄉社而祀之故老相傳未知何据兵火而後祠亦廢矣永賴祠祀明浙江巡撫龐公在鳳林寺右祠久廢光緒初烏程龐芸皋雲鎔捐資重修祠側有遺安堂飲淥軒雲抱水邊樓鐵華吟社卽附設遺安堂之後龐公南海人嘉靖癸丑進士治浙行一條鞭法民德之爲建祠祠有萬歷十六年立侍御龐公遺愛碑陳善書

左文襄公祠爲竹素園故址 世宗憲皇帝嘗御書竹
素園扁及七言聯以賜中多亭館其題額曰湖山春社
亦舊題雍正九年總督李衛創建以祀湖山之神曰香
泉室曰景樓曰臨花舫曰水月亭曰桃溪深處曰流
觴亭曰觀瀑軒皆舊名也辛亥以後祠廢

丁家山下 先塋之左舊有履泰將軍廟問其緣起罕
有知者後閱武林舊事西湖三堤路有履泰將軍廟注
云有天澤井葛仙翁所植古松將軍錢唐人姓孫名顯
忠仕吳越時嘉熙中趙與權尹京禱雨有驗奏聞因勅
封天澤侯

香祖筆記云杭州臬署本宋岳忠武王宅東偏有王祠
祠後又有一祠並祀文信國及元伯顏養濟院則祠嚴
嵩爲土地皆不知起於何時按岳王祠今尙存文信國
祠後移于西湖三台山見兩浙防護錄養濟院已廢

杭州府署土地神相傳爲蘇文忠公集公詩語爲靈籤
事涉傅會然瀆公甚矣京師翰林院衙門以韓文公爲
土地神其不經正相類 先大父詩云生前遭遠斥死
後辱卑棲如何磨蝎恨生死似昌黎

葵巷南宋時名葵巷不知何時訛作葵地鄰東城有吳
氏舊廬沈輔之丈映鈐自嶺南歸得此屋葺而新之名

曰間園築室三楹顏曰退一步想庭植牡丹數百本花
時讌客極觴詠之盛丈歿後售于官改爲敷文講廬時
吳左泉工部主講敷文書院以萬松嶺僻遠于此別設
講廬爲諸生擔簦負笈就學之所書院廢胡氏得此屋
改建安定學堂

金衙莊爲前明金中丞學會別業 國初歸餘杭少司
農嚴公顯亭司農孝友以祿不逮養題所居曰臯園用
志臯魚之痛地傍城隈水木明瑟爲城東冠中有梧月
樓滄浪書屋跨溪小太湖墨琴堂綠雪軒夫容城怡雲
亭諸勝乾嘉諸老恒于此游賞道光初歸章文簡相國

後又爲嚴小農河督烺所居咸豐兵火園坵樹石無恙
吳梅村書滄浪書屋楹尙存同治初吳曉帆濮少霞陸
存齋萬箎軒四君購得榜曰四間別墅未幾鬻于官改
八旗會館旣改建浙江忠義祠設采訪忠義局祠側餘
地建前學政張文貞前布政繆武壯二公祠又別建張
文節公祠文節直 上書房以寇亂假歸省親圍城中
賦絕命詩自經死

忠清里舊名昇平巷

萬歷府志坊巷門
有昇平坊卽此

北爲褚家塘明

正德十五年巡按浙江監察御史唐鳳儀建忠清里坊
時胡世寧起徒中拜湖廣按察之命鳳儀欲爲建坊世

甯謝曰賴主上寬仁得免罪戾幸矣何以坊爲唐有僕射褚公里人也當時諫易后忠莫大焉我明四川按察僉事王琦兵部郎中項麒皆與同里清望重一時世甯願爲之執鞭者也若移樹坊之工爲三公表世教民所益良厚鳳儀感其義遂爲樹忠清里坊於塘南巷口云見萬歷杭州府志姚靖西湖志

揚清祠嘉靖間提學孔光奏建祀王公琦項公麟琦以四川按察僉事告歸清介絕俗枵腹以歿諸孫貧至爲傭麟官兵部郎中文學孝友以疾歸四十餘年閉戶以終一子貧贅依人胡端敏言舉世尙通達而賤方介以

致二公泯沒無聞乃請於官立坊以表章之而二公之名遂與褚公並傳逮今數百年屢燹屢建過其祠者咸景仰流風不置云祠有夏壽嵩重建祠碑同治初仁和知縣姚光宇重修祠碑

余家居岳官巷攷巷名所自不得其說後讀汪槐塘沆文集爰贈君家傳云爰氏於宋建炎間自汴徙家鹽官不知何代復徙省城相傳前明中葉有孝廉雲橋與從弟龍山並官司訓居貢院東今所稱學官巷是其舊址乃知岳官爲學官之譌爰氏後遷居大方伯里贈君名漣字干波子荃乾隆己卯舉人官盧氏知縣考嘉靖仁

和縣志此巷舊名打鐵小巷

忠清里有趙松谷殿成目耕園具泉石花木之勝後歸沈氏沈名清藻字研香乾隆乙未一甲三名進士里人皆稱爲沈探花家光緒初歸永康應敏齋寶時疏泉疊石多蒔名花榜曰適園中有憇鶯花館豆花疏雨山房諸勝劍州李榕爲之記

承平時士大夫於湖上築別業供游賞者不可殫紀如徐文穆清風草廬翁蘿軒白雲山房孫景高寶石山莊陶篁村泊鷗山莊錢叔美野鷗莊朱彥甫長豐山館黃霽青小竹林潘紅棨怡綠莊汪小米水北樓錢秋峴綠

楊村舍王安伯小輞川其最著者興廢不常至咸豐庚辛之亂蕩然無一存者光緒間高白叔舍人築紅櫟山莊地爲明戴大有讀書處有且住軒小仇池室藏山閣鷗渡此可通舟處田田榭聽雪犖确亭諸額室宇精絜樸素無華騷人墨客每樂讌游於此

吾杭自明季張右民與龍門諸子創登樓社而西湖入社西泠十子繼之其後有孤山五老會則汪然明李太虛馮雲將張卿子顧林調也北門四子則陸藎思王仲昭陸升鬻王丹麓也鷲山盟十六子則徐元文毛馳黃諸人也南屏吟社則杭厲諸人也湖南詩社會者凡二

十人茲爲最盛嘉道間屠琴陽應叔雅馬秋藥陳樹堂
張仲雅諸人有潛園吟社而汪氏東軒吟社創于海甯
吳子律小米舍人繼之前後百集舍人刊社詩爲清尊
集戴簡恪寓杭州天后宮有秋鴻館詩社亦驂靳焉潛
園東軒皆有圖東軒吟社圖費曉樓畫今尙存汪氏潛
園圖則不可得見咸同以後雅集無聞光緒戊寅族伯
父筠軒先生創鐵華吟社首尾九年先生歿而湖山歎
詠風流闐寂矣

國朝浙江重宴鹿鳴者康熙丁卯周天相丙子吳大燾
甲午萬承式附癸巳恩科錢家墜丁酉趙世玉雍正癸

卯陳克鎬己酉吳嗣富乾隆乙卯附丙辰恩科馮浩戊
午顧光范崇棨袁枚丁卯梁同書乾隆壬午余集乾隆
丙午汪農嘉慶庚午張應昌張先生以同治庚午重宴
鹿鳴是科考官爲順德李文田李公鄉試舉主張惕
齋興仁先生從子也以門下門生禮來謁先生有紀恩
詩裝作冊子李公署其冊首曰國朝浙榜重宴鹿鳴第
十五人并繫以詩一時和者甚眾亦鄉邦故事也

西湖山水甲天下鼎革之際勝國遺老隱姓名遯跡湖
上者尤多先高祖杭郡詩輯無名氏一卷據夏基西
湖覽勝詩選所載得二十四人曰閉戶先生曰河渚生

曰花間散人曰靠天翁曰墨憨曰鳧友曰泊菴曰漱石
翁曰粹菴曰渡船翁曰焦梧生曰龍井山樵曰烟水客
曰天容子曰小林逋曰竹逸曰心菴懶叟曰松牖書史
曰璧菴曰藤石曰山澤臞叟曰拙存生曰藝園遺老曰
長嘯客是殆月泉吟社之流不僅膏肓泉石也

蕉廊脞錄卷三終

蕉廊脞錄卷四

錢塘吳慶坻撰

吳興劉承幹校

方正學先生被難時有魏典史澤者匿先生幼子于笥
中以出適外家陸氏時籍禁方甚不可留乃變姓名居
江陰缺方字之末筆而爲六幼子名朗避難時才四歲
至本朝嘉慶間十四傳矣六承如字賡九爲李申耆先
生箸錄弟子明史惟云先生二子皆自經不云更有幼
子六氏譜云朗尙有兄曰德宗避松江更姓俞申耆先
生爲賡九題正學讀書箴詳識顛末必有依据今浙江

候補知縣六某亦其裔也有小印曰正學後人

姚湘字夢峽餘杭人明季諸生明亡不肯鬻髮隨金堡
飄泊楚粵堡以事繫獄出獄後爲僧夢峽不知所終船
山年譜云湘附永歷實錄金堡傳船山有荅姚夢峽秀
才見柬之作兼呈道隱黃門此詩編入順治七年庚寅
明桂王永歷五年也

先曾王父小羅浮山館詩有哭毛海客七言長歌一章
蓋知簡州殉土寇之難者海客名大瀛寶山諸生善屬
文工詩試輒不利五十外以薦舉得官教匪起湖北蹂
躪河南陝西四川大府奏毛隨營以功擢知縣尋知簡

州土賊復發城守踰時援不至城陷罵賊不屈死著有
戲鷗居叢話洪北江嘗記其客山東巡撫國泰幕事則
海客固振奇人也其孫嶽生有文名

張古虔司馬中寅大興人道光十五年舉人咸豐初以
同知候補蜀中善書學顏魯公筆意 先大父嘗乞司
馬書楹帖余頗珍異之近得司馬之子林所爲行述及
順天府志先賢傳知司馬官松潘直隸廳同知咸豐庚
申番夷叛城破死之事聞 贈道銜給世職於陣亡地
方暨原籍建專祠入 國史忠義傳書學平原忠亦似
之昔人言心畫可以見人之性情氣節諒哉

朱光縉字侶喬浙江錢塘人以府同知需次蘇州咸豐十年春蘇垣告警前署布政使蔡映斗督兵防堵平望光縉爲之副及賊至或勸之走光縉曰此固不足以守然大吏勉吾死守義不可不死且城已破吾母度必死母死不能救又不忠於所事是重吾罪也乃率勇丁逆戰一晝夜死者相枕藉遂揮佩刀刺賊目因被害母吳氏妻戴氏妾楊氏等城陷日皆投池死

成都浙江會館中祀浙人宦蜀有政蹟者而以死勤事別立一龕中有倪公霖死金川之難吾邑人知之者罕謹錄之倪霖字雨蒼仁和人偉姿容好騎射性落拓不

羈納貲爲縣丞分發四川署巴縣丞木洞巡檢補西昌
丞權簡州州判金川軍興檄調軍中爲登春營巡捕官
霖探知降番欺飾狀請移師就大營以壯聲威毋爲敵
誘木果木之變又請由美卧溝間道出攻賊眾謂其卑
官好紛呶狂誕幾至窘辱霖憤歎不已迨登春營出戰
霖荷戈從戰死事具西昌縣志

仁和曹燮坤官廣西全州知州咸豐二年夏洪秀全大
股北竄犯全州燮坤誓死守半月賊盡銳來攻援絕城
陷死之見沈映鈴退庵隨筆

沈耀章字鳳臺錢塘監生成豐十年署雲南永川知縣

賊攻永川縣無兵耀章齧指血書速救永川四字遣人疾馳詣四川重慶鎮總兵某乞援兵久不至城陷遇害沈壽榕玉笙樓集有弔沈君詩

華學本字惺子仁和諸生與餘杭令某善招入幕中軍事起餘杭當賊衝縣城防守頗倚之咸豐辛酉杭州再陷學本方里居挈其妾楊投井賊猝至妾先入井死學本被戕

陸文烈公官湖南按察使與余善喜劇談嘗言其官撫甯縣學教諭時江蘭生太守槐序方知撫甯縣事議修城招學官紳士集議是夕公夢一人來謁名刺書王臺

二字既入見曰今日議修城之江大令卽吾後身也吾於明季官此李自成寇邊撫寧城圯不可守乃具牛酒犒師去自成一片石敗退復過此則吾城守已完力卻之卽甲申歲事也今江令來踵修吾意良慰因書一長聯畀公末有補前身未了因緣語且曰吾修城有碑記事在南門甕城中又有生祠在城隍廟側翌日公以語江江色變良久乃能言公歸檢縣志明末縣令有王臺訪南門碑故在訪祠已傾圯而故址猶存因爲葺祠宇書楹聯云補前身未了因緣是幻是真吾不信也考我公當年政蹟以享以祀禮亦宜之次日又夢其人復至

曰子疑我晚節之不終乎我以不從薙髮之令削迹歸山陰原籍終身不復出公醒而識之謂王固抗節完貞者故歷久而神靈不昧如此也

庚子京師之變宗室伯第太史壽富殉節臨死作三絕句爲書以寄華瑞安太史學瀾明年瑞安典試貴州瀕行以此函歸其家人閩卓觀察孝復以付石印傳於世書云大事已去侍國破家亡萬無生理老前輩如能奔赴行在敢祈力爲表明侍於此地此時雖講西學並不降敵家人有不願死者尙祈量力照拂如死亦聽之外有先人奏疏年譜及平生著作並以奉瀆亦祈量力保

全之敢百拜以請匆匆不及走別是爲至憾詩云衮衮諸公膽氣粗竟將血氣喪鴻圖請看國破家亡後到底書生是丈夫曾蒙殊寵對承明報國無能愧此生惟有孤魂凝不散九原夜夜祝中興薰猶相雜東林黨黨禍牽連竟陸沈今日海枯看白石二年重謗不傷心

番禺汪兆鏞己丑舉人東塾弟子也頃寄示所作辛亥三秀才行曰辛亥之變湘潭何性存秀才

承鑫

方客粵

東某提督所亂作遂自經香山李郇雨秀才

澤霖

居邑

城南爲童子師聞變閉門絕粒五日死江陰趙煥文秀才

彝鼎

遭難痛憤不食三日未殊手書絕命辭大旨以

朝廷養士三百年豈容謬倡排滿之說書畢至三賢
廟自經死之皆一介諸生耳大節凜凜如此爲賦辛亥
三秀才行油幘老記室白屋村夫子藐然青青一衿耳
臨難誰能責以死偉哉乃有三義士何生橐筆細柳營
妖氛忽犯循州城城亡義不圖苟生碧燐夜照豐湖清
同時李趙二文學徒聞賊民之興大詫愕蔑棄禮教曷
爲國志士豈忘在溝壑畢命辭成萬夫卻絕粒投繯神
自若得此類池芹藻不寂寞嗚呼興亡自古何代無痛
絕眴息海水枯長白山隸漢版圖東塾著說徵班書妄
辨種族欺瞽愚大盜移國罪當誅茫茫天意何爲乎九

域從此流毒痛三子一瞑翔霄衢蟬蛻不受滓濁汗愧
死印纍綬若卿大夫 聖清三百年養士之澤報區區
同治乙丑丙寅間余隨侍太原治舉業從永清劉西樓
先生仲篴講授先生癸亥進士卽用知縣發山西方嚴
耿介不諧於俗 先大父重其學行命師事之先生于
論文外尤以窮理盡性相敦勉越二年先生權某縣事
余亦侍 先大父南歸先生卒以清貧歿于太原迨余
官京師得見先生後人恂謹有家法後閱光緒順天府
志先賢傳乃知先生父諱毓崑字貢林號壽山諸生天
性孝友母嘗得驚悸症惡聞聲崑每省視必解屨戶外

徐步榻前有女弟適張氏壻爲父兄所凌虐乃析居貢
林爲購田宅與己居無異嘗曰吾終鮮兄弟何必異視
吾妹嘗於中夜起涕泗不止人問之則曰吾夢二親承
歡如平時醒則杳矣時年已六十其孺慕如此道光十
二年大旱請于知縣萬侯勸捐賑卹並首倡捐資全活
甚眾子伯壘道光乙巳進士仲篋亦以孝聞有父風按
府志據永清縣志采錄度修縣志時在癸亥前故未載
先生科目也

夏子松侍郎事繼母孝其女兄弟之同母異母者凡九
人友愛之如一其已嫁而家貧乏者皆招使同居并其

姊妹之夫與其戚屬皆與焉家屢空而食指恒數十人
戚友有就謀者無少卻急人之急或輾轉稱貸以周之
官屢遷而清貧如寒士往往日止一飯丁卯簡江蘇學
政未行丁繼母憂奉喪歸又其女兄子婦及二殤女一
老僕之棺由潞河南下而戚友及鄉人之櫃託附其艘
同歸者凡六家會賊擾東昌河路梗乃改道天津附番
舶而南船價巨前託之者所出貲皆不足或勸以婉告
其人使自歸其櫃侍郎不可各爲之益價而同歸焉侍
郎立朝大節具見復堂所撰碑銘此盛德事當別書之
爲鄉里後生勸

侍郎封翁教子嚴居恒稍不當必訶斥侍郎少有羸疾
官京師時疾幾殆夢封翁詔之曰爾福薄食天家祿幾
許應卽死勿貪戀也旣而疾稍瘳又數年計所入俸與
夢中封翁所告已越其數竟無恙後復夢如前且盛責
之曰勿貪戀若官至一二品卽死矣官宮詹以史館保
案掌院將以加閣學銜請于朝力辭乃免其後擢侍
郎直毓慶宮以勞悴薨于江蘇學政任所夢中言果

驗

富陽龍門村孫步蟾家貧服田奉母不少懈年十七父
卒號慟絕而復蘇者三鄰里喻以母在何遽死乃力營

殯葬奉母如初後數歲母疾劇醫藥無效步蟾奉香北面拜禱於神剗臂肉和藥以進其夕母夢白衣老人子藥丸一食之覺而藥香猶在口頰病尋愈又七年母卒廬墓三載哀慕之思至老猶然同治十年卒年六十二巴陵謝麀伯前輩事親孝母太夫人持家儉麀伯每出得新物美饌必市歸以獻太夫人輒不悅後得甘旨付其所暱之友使轉奉于太夫人爲若其友所餉者然母怒必跪母前昵昵作小兒態且持母兩手批己頰母笑乃已太夫人待婢媪至仁厚曰彼猶是人也吾有何德而使若輩執卑下之役於我麀伯乙卯舉于鄉公車北

上過保定逆旅有客哭甚哀問之則黔人訪其戚不遇
餓且死謝憫之解橐贈以金又謀諸同行者集貲助焉
麀伯自記前生爲衡山某寺僧嘗道經其地入寺信宿
乃去寺僧贈以念珠朝夕不去手雖倉卒酬酢未嘗輟
也

餘姚翁瀛字大環康熙壬申游廣西道湖湘喜爲詩舟
中日以作詩爲事遇山水佳處輒登覽徘徊不欲去時
或上船頂吟嘯終夕露立舟子知其癖也亦不爲禁一
日舟次新塘得句云霜濃古寺鐘聞處一點空明透佛
燈明日手書鐫之篋是夕竟失所在其家聞信孀妻稚

子痛哭招魂同行者亦莫知其何繇也至雍正癸卯子
運標成進士痛不得父遺骸偕兄運槐操小舟溯洄衡
永間風號雨泣行路哀之爭相傳說丁未八月遇一老
人鄭海寰者述其弟海生於康熙三十一年十月七日
從敗葦中得一屍身佩小鑰遂同擇地瘞於白沙洲收
鑰封識以待其家人運標兄弟噉然而哭遣善走者馳
至家出鑰證之而合乃廬其父墓旁三月啟壙扶榇歸
仍留形蛻處加以封樹乾隆初運標官武陵知縣命兄
子會典營祠墓前額曰永思顏其庭曰啟鑰買田以畀
守者丁卯運標擢道州知州過展祠墓依戀數日乃去

至祁陽延見父老繾綣如故舊祁陽人莫不稱爲翁孝
子云嘉慶間族孫元圻爲湖南布政使復修祠宇云湖
南通志載其事而前祁陽知縣覺羅卓爾布撰啟鎰庭
記宗滌樓永州志稿寓賢傳載其事尤詳

錢塘許默齋先生承基仍世孝友父序賓遭親喪廬墓
終身默齋弟仲昭侍母疾刲股和藥創甚而殤年才十
餘歲也默齋思弟不已乃繪爲連枝圖作並肩坐石上
喁喁對語狀同時名流題詩者數百家

桑叟甫先生之弟字東愚隱居東郭足跡不出國門指
爪長尺餘人呼爲長甲處士東愚有採藥畫卷陳句山

先生爲題七律一章跋甫先生之父以孝名世所傳抱
鑑圖者也

翁同龢等奏爲已故儒臣孝行可風籲請列入 國史
孝友傳以彰至行摺竊惟 朝廷制治以孝爲先人臣
致身資於事父此天地之大經古今之通義也伏見故
國子監司業治麟生有至性其學術以宋儒尹焞爲宗
律已教人鞭辟近裏同治初年該員之父景廉任伊犁
參贊旋統兵剿賊其時該故員年僅二十四匹馬出關往
來省視比長承侍左右色養無違景廉之疾篤也不欲
人侍該故員屏息戶外聽于無聲有呼則敬唯有所苦

則抑搔扶持終夕徘徊風露中履跡重沓倦則倚檐柱
以息四十餘日用是成憂勞羸困之疾其父旣沒該故
員病已深矣旣葬越小祥鹽酪不入于口醫者以豕肉
汁進謂得此可脂膏五臟該故員屏而不飲臣等見其
瘦骨柴立亦援古人居喪有疾之禮諄諄勸諭該員閉
默涕泣而已苦塊之中編次其父遺稿一字之誤反覆
審訂至於嘔血數碗死之夕遺書猶在旁也臣等以爲
魯襄亡而子野毀不見絕于春秋此聖人教孝之微意
然則卽死於毀歷代史冊猶且褒揚之況該故員蒸蒸
之孝徵於平時孚于輿論眾著于宗族師友之間者乎

我朝功令孝子有旌閭之典國史列傳特立孝友一門光緒四年蘇松太道馮煥光以孝行可嘉准予立傳臣等竊惟太學爲教化所出之地該故員事親盡孝無愧人師臣等誼屬同官見聞確實合無仰懇天恩特降諭旨准將前國子監司業治麟列入國史孝友傳仍由館臣咨行該旗查取事實清冊以備纂輯用以風勵天下疏上奉諭旨俞允

齊占魁直隸東安縣留犢邨民寄居於涿事祖母孝祖母疾亟醫巫告凶占魁禱於涿州之北塔求以身代祖母疾果瘳占魁乃躋塔巔自投而下震於地死之光緒

十四年三月十二日也年二十九州上其事請 旌禮
部議駁兼順天府尹潘祖蔭順天府尹高萬鵬奏援光
緒六年浙江會稽縣附生王繼毅母疾請代自沈鄞之
月湖得 旌例以請 詔俞之潘公爲文記其事而順
德李侍郎文田書之爲立石於北塔之側余至涿親至
塔下徘徊久之

羅江縣金山鎮西有明季義烈貞女王氏墓碑云明崇
禎末有官四川布政使王某到蜀惟一女從行聞京師
之變某欲興師勤王女力贊之懼己爲父累乃自殺遂
葬於此後人爲立石記其事惜傳聞未詳布政名字里

貫均無可攷

寶山縣朱詒烈繼室張於癸丑六月滬兵譁變時潰軍將至倉黃自溺于井急掇得蘇旣蘇復溺翌日避于先人墓廬旋自經檢遺篋得黃絹緘一枚方廣才寸餘而綫縫甚密外纏紅繩二中用油紙三層裹一咫尺長寸寬之素紙有手書端楷二行其文曰大清江蘇寶山芝坊朱君印詒烈之正室清河氏悟音大難

烈婦馮氏貴州人年十九爲湖州趙翰卿遙室翰卿爲忠節公第六子以通判官廣西擢柳州知府以道員升用爲粵督岑劾罷尋知其寃江督爲奏請開復原官調

江南辛亥國變失職貧甚奔走浙東温台之間置眷屬于杭州癸丑夏七月之金陵邁疾還滬臥逆旅其戚姚某迎之歸疾亟馮氏從杭州馳至日侍湯藥翰卿卒無子嗣子在蘇州不至姚某經紀其喪馮氏哭之哀既送殯歸向姚某稽顙謝屬其孤女夜服阿夫容膏舁入醫院治之不效遂歿年三十九

硤石之卜家場有陸氏婦夫死子才五齡女一未周晬也孤苦無以存活夫弟勸改適不從願乞食撫孤誓不負死者於是攜子女丐于路辛酉賊至僅齧草以活賊平爲人傭稍稍能自贍子亦長矣賃破屋以居每歲餉

蠶必獲利天將以報其苦節矣

應先生搗謙字嗣寅號潛齋自稱無悶先生仁和人生而有文在其手曰八卦左重耳右重瞳稍長以斯道爲己任侍母疾數年不懈母爲娶婦終不入私室母卒終喪始行合卺禮大科之徵李公天馥項公景襄交章薦輿牀以辭范公承謨又欲薦之乃稱廢疾所箸說經言性理諸書凡十二種河陽趙公士麟刻其性理大中儀封張清恪刻其潛齋文集乾隆府志入儒林傳

潛齋門弟子甚眾而篤信師說敦行不怠者以凌文衡沈志可爲最著文衡名嘉印錢塘人少爲杭郡司李吏

好讀書匿書直合案下夜伺他吏熟睡然燈默誦四十
後棄爲吏受業于潛齋盡得其傳六十後注禮書日幾
葉謄寫日幾葉皆有課程嘗言學問須到造次顛沛必
於是方有得力處志可名士則仁和諸生嗣母周性嚴
厲常加譴責長跼待罪雖勞不怨學禮于潛齋居家授
徒端坐整肅盛暑不去冠襪嘗定宗祠祭規而尤詳於
古歛禮葬禮

錢朝彥字殷求號定林錢塘人明崇禎丁丑進士官句
容知縣丁父憂去明社旣屋閉門卻軌自比于棄妻嫠
婦匿影牆壁同年故人官浙中者概不與見亦不報謁

家貧所居皆僦人老屋危榱析棟不蔽風雨己亥江上之變有言定林將爲內應者提督田雄下章捕之囚獄中十日偵者告曰錢公儒者莊坐圜圉若無所畏苦田意解乃放歸定林嘗師事漳浦黃忠端其詩與書法皆效之見吳農祥所撰傳吳允嘉武林耆舊集

陸圻字麗京一字景宣號講山錢唐人崇禎年選貢與弟培塔高文異采號爲三陸乙酉培以行人殉國縊死桐塢講山奉母隱居河渚而賣藥於茗霅間月一歸省莊籠私史獄起无妄被收久之得釋故居被燼乃攜一老僕採藥名山老僕歸講山不返或云在嶺南爲僧名今

龍或云入武當爲道士竟不知所終少時詩名藉甚漁
洋山人推爲西泠十子之冠有威鳳堂集黃書厓武林
先雅載其軼事尤詳

汪汝謙字然明號松溪道人錢唐人明季由歙徙杭延
納名流文采照映有湖山主人之目迨陵谷淪移遂入
閩爲福廬武夷之遊比歸隱居東城與李太虛馮雲將
張卿子顧林調訂孤山五老之會年七十九彌留待盡
神明湛然猶要雲將諸公品畫談詩吹簫摘阮視蔭旣
移抗手告別而卒

張遂辰字相期號卿子又號西農仁和人高懷卷迹似

嚴君平鄭子真一流人好譚易精於醫學歲輒活數百人所居在城東至今名爲張卿子巷蓋當時婦孺皆震其名委巷流傳竟成故實西農每于歲闌輒勉誠子息云家足過年之用坐無寒士之求不惟有愧本心抑且無別流俗又嘗述其祖龍墩公貧止一布袍除日逢急卽解贈之樊榭東城雜記稱清門世德可以激薄停澆先正風流不徒以高隱名矣

張右民字用霖號東皋錢唐人用霖爲葛寅亮高弟窮究經籍天崇間與龍門諸子創登樓社明鼎旣革栖隱東城己未鴻博之徵撫臣欲以用霖應堅辭不就年八

十三乃卒四方會弔者八百餘家學者稱爲東臯先生
著有史論史略竹窻語錄東臯詩文集

丁文策字叔范號固庵錢唐人貌瘦削而面黑人目爲
黑丁少爲諸生有聲甲乙後遂棄去偕母妻避居駱家
莊巡撫張存仁聞其才迹所在而說之嘿不應承之以
威不動曰鐵石人也幅巾單衣蹒躅風雪中旣哭二人
痛不能盡養鞠育兩弟周卹有無家貧授徒以給朝夕
學者稱爲江樵先生

虞鈞字峻民號兼山又號白菴錢唐人明季諸生少孤
侍祖母疾嘗搯胸肉療母氏王病篤戒之曰吾茹素四

十年慎毋以曩事相累毋沒終身不御酒肉廬墓側三
年有事而出雖風雨泥淖夜必趨至墓所人稱爲虞孝
子云易代後荷鋤自給不入城市其學以朱子爲宗明
經修行耆年益篤其卒也門弟子及其兄子私謚曰貞
孝先生

柴先生紹炳字虎臣號省軒又號翼望山人仁和人少
奇敏爲文宏博典麗父應權官莆田教諭故事學官子
弟許隨任赴試因試補莆田諸生移牒本籍浙學使不
可復歸應試自縣府以至學道三試皆第一宏光時馬
士英欲引進之以翰林官誥命中使馳召先生不爲動

馬怒曰渺小丈夫矜高乃爾耶先生歎曰吾深恨夫七尺軀以敗乃國事者蓋先生素羸弱軀短且瘠也其後布衣幅巾鍵戶南屏一以著述爲事凡天文地理禮樂田賦水利兵制莫不窮竟原委勒爲一書康熙己酉詔舉隱逸巡撫范忠貞公以先生應力辭乃已家城東老屋數楹厠于壞垣廢圃間枯桑敗竹三徑荒寂一夕夢黃公道周劉公宗周倪公元璐吳公麟徵合一刺召先生遂沒沒有傳其爲冥官者

沈先生昫字朗思初名蘭先字甸華仁和人年十六入郡庠甲申後棄去與弟蘭或自相師友以考究性命爲

務嘗執經劉戡山之門事父博山與母氏秦至孝以東
脯爲養誨子毅中純中勿令干祿室無容榻桁無懸衣
披帙覽書凝坐終日嘗絕粒采階前馬藍食之或餽米
數斗不受其人固請則固辭方宛轉避謝間遂餓仆于
地其人惶駭去良久始蘇笑曰其意可感然適以困老
子耳卒無以爲斂應潛齋經紀其喪潛齋門人姚宏任
篤行君子請斂先生潛齋許之詳鮪埼亭集所爲墓誌
銘

顧卣字竺公亦曰琢公號山臣錢唐人美須髯善談諧
家貧支一足鐺於慶忌塔晚年移入城是時婁東虞山

以舊臣赴闕號于人曰吾輩起以紓清流禍也山臣曰
淫人能衛貞女耶吳中允太沖幽囚十年門生故吏搖
手不敢一問山臣獨冒死相對周旋患難君子賢之善
大小篆語人曰若爲我治良田十畝我爲若篆我死其
價可當秦十五城同時有施萬字大千號汗漫子亦以
詩名工篆隸摹印尤在何震陳士衡上惜皆不傳

陳廷會字際叔號瞻雲錢唐人六歲始能言九歲作寇
萊公枯竹生筍賦人爭奇之補諸生崇禎癸未郡東門
有海大鳥集焉人面獸身六翼四足際叔歎曰此鴉也
所見之國其下多放士因自號鴉客作鴉客問未幾金

堡徐繼恩陸圻應撝謙沆捷汪楓輩或挂衲空談或鑿
坏遁迹人皆服其先見與陸鯤庭有性命之契鯤庭殉
國難留書與別以書籍盡遺之際叔奔赴爲書以報地
下美其得死所後教其子繁昭學旣成舉其父所遺書
返焉

孫治字宇台號鑿庵仁和人幼與毛稚黃游聞子將之
門子將稱爲二俊乙酉後不應試自稱武林西山樵者
篤于友誼有魏姓友逮繫以愛女爲託及友被法卒娶
爲子婦陸驥武死亦以一女託之爲擇吳檢討任臣妻
之又爲立嗣以己甥女嫁焉吳百朋令南和卒于官囊

無遺貲爲經紀其喪以歸旣老貧甚以父殯未有葬地不得已出游遂歿于澤州所著有孫宇台集四十卷

張丹原名綱孫字祖望號秦亭錢唐布衣張氏在前明
九世簪纓號甲族祖望爲都御史濂之元孫舊時第宅
國初圈入駐防營城播遷無定後徙居西馬塍有從
野堂又居秦亭山村因以爲號年三十二喪妻不再娶
晚夢神人更名丹講服氣導引之術詩名在十子之列
及門著籍甚眾少時游京師嘗冒大風雪從老宮監至
天壽徧歷明代諸陵識其道里遠近寢隧規制而詳爲
之記亦振奇之士也

沈謙字去矜六歲能辨四聲旣長補諸生才名爲西泠
十字之一鼎革後隱於醫其先人逸真先生善岐俞之
術故吳百朋贈詩有乃公術過長桑君之句先大父輯
杭郡詩時得里中金氏所藏去矜手書詩卷其自跋云
庚寅四月二十三日四鼓過寒山曉月映塔流屍觸船
披衣起視悲愴欲絕離亂之苦大略可見天明因錄本
年五言律四十四首聊以當哭詩中如鼓輦孤客淚書
札故人心孤冢兒啼苦空庭馬跡深白髮悲行役青山
厭亂離苦霧沈荆棘青燐見髑髏多悽婉之音

施相字贊伯號石農郡諸生性高潔不樂塵市屏居河

渚張村名曰幽居與徐介狷次交契爲築室于叢竹間
名曰竹廡狷次居其中十六年其後遣妻子返湖墅故
居獨與狷次嘯傲煙霞往返無定狷次卒會石農他出
其子雲蒸遠遊而雲蒸婦命穉子傳語諸門生曰徐先
生大故嘗聞翁言矣請以中堂奉棺含斂比石農歸撫
棺慟哭旋摩穉孫頂曰汝能代母傳言真吾孫也其篤
友誼如此

徐介初名孝直字孝先後改今名字堅石號狷菴又名
曠號淥溪仁和人明季諸生陸圻之甥也家塘栖落瓜
堰乙酉年二十棄諸生易其名曰介妻死不娶子死不

嗣去田園壟墓白衣冠垂五十年轉徙無定所後入河
渚愛浦澈陂塘之勝遂寄棲施石農廡下巖毅疾惡狹
中鮮容非分之餉錙黍不受性豪于飲大醉取詩牋寸
寸碎之投水中曰世安有能讀徐生書者又善哭醉益
甚春晚聞杜鵑聲則投淚擊涕發聲磴磴而不可止見
者以爲狂生曰我非狂乃狷也因號狷菴旣以爲狷不
敢希復易爲狷次云

姚文虞字德善亦仁和人工詩甲乙之後澗壑自安蹤
跡與徐狷次相似善書狂草所作詩皆燬于火

徐宏道字景行仁和人明季福王建國南都景行爲督

工官入 本朝遂寄迹湖山以終

陳麗字貞倩號正菴錢唐人嘗從兄元倩治軍大梁爲
總兵官所規畫陰與孫吳兵法合當其時諸營纍纍如
兒戲獨貞倩軍屹不可動迨滄桑改易乃韜晦恣意爲
詩孫字台亟稱之貞倩弟晉明亦隱居不出

胡介初名士登字彥遠號旅堂錢唐諸生故居在河渚
人迹罕至及江上兵起入城僦居一畝田遂更其名以
示蠱上履二之志嘗一游京師梅村芝麓諸公皆折節
納交而彥遠意氣寡兀亦莫能籠絆之也

張兢光字又兢號覺庵長自名闕於祖望昆弟爲大父

行絕意仕進束修砥厲如後門寒素性峭獨自熹不妄
交一人所撰述稿藏笥中雖宗族子姪不得一讀柴虎
臣與爲鄰比始得窺之因呼毛馳黃諸公共訪之子是
覺庵之名始著

傅齡文字長質錢唐人父巖字野倩明崇禎甲戌進士
官歙縣知縣從朱閣部大典駐師金華 王師下浙江
被執死之子三齡發齡熙抱父尸以殉齡文遷父柩歸
藜藿不充者十年而卒見武林耆舊集

吳本泰字美子號藥師又號柵菴仁和人崇禎甲戌進
士除行人授吏部主事改南京禮部歷郎中甲申後隱

居不出西溪有蒹葭里歲丁亥櫛菴自海上遷避卜居
于是其地近秋雪曲水諸菴與僧智一寂瑞閩僧道援
輩往還參叩園居饒篁竹而乏梅智一移贈古梅數本
刷地種之因自號西溪種梅道者著西溪梵隱志四卷
徐之瑞字蘭生錢唐人崇禎丙子舉人申酉後棄孝廉
遜居北烏山與汪魏美萬履安巢端明齊名浙中謂之
四先生當時將欲推選蘭生不行或劫之以法則舉所
佩悅示之曰此我磬懸之具也嘗爲西湖竹枝詞以寓
變哀之怨

汪風字魏美錢唐人崇禎己卯舉人欽寄歷落寡言笑

時人目爲汪冷甲乙之後奉母渡三江躋括蒼崎嶇山澤間者有年母老欲就養于兄澄魏美念母不忍遠離而又矢志不入城市藏身北郭每間月輿母至相與抑搔色笑爲樂是時湖上有三高士魏美其一也當事重其名或割俸金爲壽不受監司盧公遠心相值于僧舍問汪孝廉何在魏美應曰方在此今已去矣盧公悵然不知應者之卽魏美也朱竹垞嘗訪之大佛寺僧寮竹榻蘆簾不蔽風雪瓦鑪火死不能具盃茗又嘗偕魏處士允桷過朱時已初冬共宿樓上所攜布被猶未裝緜年四十九歿於寶石僧舍時康熙乙巳也

關鍵字六鈐號蕉鹿錢唐人崇禎癸未進士甲申除丹徒令南中擁立六鈐請設沿江水柵諸客將之劫商舶者又以計禽劇賊鄧七不半年遽棄官歸歸隱四十四年絕口不言世事尙書宛平王公相國眞定梁公皆同年交契欲推挽之卒不答兩公語督撫曰君部中有吾故人梅子眞嚴君平之流也爲我善視之六鈐謝病不一謁卒年七十有九

李南字逸度號遂初錢唐人相傳爲徐中山後人官右班鼎革後棄家遠遁因挾崑山李氏子同竄以伯季相呼故姓李以來南故名南疾革時子嘉錫跪請宗姓所

自及名與字瞋目叱之終不言故其子孫懵不知爲何氏也所居曰沙河塘賣藥自給不妄與人交惟施相徐介諸隱君相往來而已卒年八十五

馮軾字士式錢唐人自言鼎革後不閱題名墨藝嘗與沈去矜諸公結平泉詩社而毛稚黃稱其有抱石焚山之節蓋高隱士也

沈齊賢字寤伊錢唐諸生性峭直常以濟時爲己任時流寇充斥江浙騷動寤伊上書略謂餉不知措兵不知用地不知屯民不知恤東於具文畫界而保以聽流寇之蹂躪可乎不省甲申思陵殉社稷隨郡搢紳後哭臨

三日不食經旬復私立木主於里社朝拜畢伏地哭社
故祀雷神猙獰可怖寤伊怒目叱曰汝亦當爲國捍禦
徒赤髮金睛嚇里媪乎閭巷小兒環視而笑則起逐之
市人皆以爲癡會山陰劉公宗周至杭急往謁扼學論
時事聲淚俱下諸儒皆白冠環坐一生忽私語曰黃巢
朱溫恐亦天命寤伊直前奮拳毆之南都旣立歎曰江
左敬仲安在欲獻策闕下恥以口舌得官遂遯跡皋亭
山下乙酉寢疾執弟子曰吾孔孟一綫尙在語不及他
卒後林瑤爲之傳

周介隱莫知其名字人私謚之曰介隱云錢唐人學問

賅博爲同人推重萬歷丙辰歲忽棄去舉子業結廬父墓之旁請於母曰有弟鄉舉可養母矣兒將守父墓遂居廬中慶弔問遺皆絕母念之或月一至他人莫得見也在廬四十七年惟以母喪一入城年八十二而歿臨歿吐氣滿室如煙雲者久之或曰介隱善天文得祕授知天下將有變不然何獨于丙辰而忽爲是耶介隱事罕見紀載郵周容春酒堂集有介隱傳